

續
古
文
苑

續古文苑卷第十八

賜進士及第授通奉大夫山東通省督糧道加三級

碑志四

大唐朝散大夫行潤州句容縣令岑

唐張景毓

蓋聞諸易曰有天地然後有萬物有萬物然後有君臣有君臣然後有上下然則星辰爲緯上陵山險所以經啓八紘彌綸萬域者也聲明文物禮樂詩書所以黼藻生靈化成邦國者也至於高居萬乘富有四海爲而不宰裁成於孕育之先感而遂通囊括於混元之首雖柔來剛往乾坤之軌躅可尋而步帝馳王

雲火之深塵不昧則疇咨四岳允釐百工大則鶴鼎
魚璜錫寵於機衡之地小則緇幡墨綬守位於子男
之國其有相門紬緒王佐推才負揭仁義周旋禮節
排九流而迴出掩三異而孤昇緝諧吐吏綏和風俗
堂上堂下驅密賤於後塵星出星入置馬期於散地
閒而以肅嚴而不殘馳心於廊廟之前圖迹于江湖
之上者獨在于岑君乎君名植字德茂南陽棘陽人
也其先出自顓頊氏后稷之後周文王母弟輝剋定
殷墟封爲岑子今梁國岑亭即其地也因以爲姓代
居南陽之棘陽十三代孫善方隨梁宣帝西上因官
投迹寓居於荊州焉自軒階垂祉姜泌開宗神岳構

其嵯巖靈根肇其枝葉其在佐帝師王封侯尚主十
卿五公之貴七珥三組之榮衣冠燭耀於區寓允緒
綿聯於載籍亦由秦移趙璧魏得隋珠不常厥地所
在稱寶何止梁亭漢室先開佐命之封吳郡荆門晚
葺因居之地若斯而已哉高祖善方梁驃騎大將軍
周起部尚書開府儀同三司長寧縣開國公食邑一
千二百戶贈侍中謚曰敬當萬機之損益成八座之
儀表銀艾圭茅金鏘玉振榮高當代龍豹之託逾深
寵茂幽局鵷鸞之寄斯重曾祖之爲隋虞部員外侍
郎襲爵長寧公霞騫電邁鳳彩龍光初膺星鳥之榮
晚襲山河之寵祖文本皇朝中書令兼太子賓客宏

文館學士江陵縣開國伯食邑四百戶贈侍中謚曰
惠宏材巨量經文緯武高標百尋絕壁千仞丹青神
化翊亮天工即隆周之申甫亦皇軒之風力若乃百
揆務殷三階事切西朝機要之所北閣神仙之地任
摠訐謨榮高密勿至於五車萬卷百家諸子吐鳳懷
蛟凌雲槩日不尚浮綺尤存典裁藻翰之美今古絕
倫父景倩周大中大夫行麟臺著作郎兼宏文館學
士綰青襟而司禮館草元經而登書閣聲榮之重驛
美於當朝燕翼之寄傳徽於後烈君紫泉飛液丹山
耀彩孤峯懸日月之輝激溜聚烟雲之氣虚心倜儻
靈鶴再舉而未窮逸調從橫大鵬六月而方息生而

好學幼而知禮孝行無待於傍授仁心得之於自然
黃憲之類顏回汝南爲貴賀循之擬龔勝江東擅名
不學左思十年爲賦聊同方朔三冬讀書不出戶庭
旣馳心於萬里將排雲日亦因基於一匱弱冠以簪
纓貴胄調補修文生明經擢第緇帷連夕拜之所紫
禁迓朝聞之地圖書所會館宇生光解褐同州叅軍
事譽警北曹聲馳南府地靈天秩渾金璞玉之材主
吏叅卿孫楚蕭何之德屬軒塋卜遠禹山斯會撫遺
劍而空存想遊冠而無及松蘿漢隧竹染湘川雖鏤
鼎銘彝將勒生金之字而庇徒葳事終資倚玉之材
課効居多恩腴俯逮特授蒲州司戶叅軍事俄以親

累左授夔州雲安縣丞賈誼長沙屈原湘水溪連五
毒攀鳥路而銜悽峽帶三巴聽猿聲而下淚秩滿丁
府君憂去職三年泣血七日絕漿殆不勝喪幾於滅
性服闋調補衢州司倉叅軍事秦稽負日楚夢含雲
東連射的之山西拒沈珠之浦上農攸屬倉廩爲禮
節之先下位斯安等列處儕流之首尋沐恩旨雪其
親累一遇雲雷之施再生花萼之榮旣席寵而沿恩
亦流根而泊葉君之兄義材望冠時聲名動俗膺奮
飛而首出指寥廓而曾騫位纔陟於聞鶯才實兼於
緣鵠旣而八龍雙驥慈明與劉岱均飛二陸三張仕
衡與孟陽齊價豈直家風祖德見稱於中旨掌紉司

綸復傳於後葉。光輝所燭。朝野增榮。然則宅火均司。象雷分邑。莊周著小鮮之誠。尹何招美錦之嫌。列五等於姬封。高十城於漢秩。字育之道。循良是資。擢授潤州句容縣令。瑤山奧壤。金陵舊地。郊原枕端。委之墟。江漢擁朝宗之水。海潮驚而翔鷺起。山氣合而盤龍見。物產殷積。水陸兼并。人多挺劍之雄。俗有亡珠之弊。君達於時事。明於政理。教不嚴而自肅。化不令而人從。吐黎感惠。愛之如父母。奸邪屏迹。畏之若神明。戶口滋豐。田疇墾闢。行太丘之道德。息灌壇之風雨。國家下武膺運。中興纂業。氛祲廓除。日月開朗。君遇見知之主。逢時來之運。若魚縱壑。如鴻順風。優制

所覃崇班益峻加朝散大夫上柱國紫泥流渥朱紱
昇榮列五采之通班連九章之賁飾於是貴而思降
盈而知損如絲之旨載流亂繩之化愈息先是邑居
湫阨里閭榛蕪爰自歷政未遑加緝君乘三餘之隙
因四人之暇覽山川之體勢量資物之豐省逐便興
功因時改作人無廢業役不浹辰流一切之權道成
累代之宏業頃緣稼穡頗■炎亢雲漢之詠徒勤京
坻之望斯絕君親加暴露徧請山川率吐庶以具馨
香俯壇塲而展誠敬濃雲布族膏雨成絲縣八極而
俱灑通四溟而廣徧自非仁心所及誠感必通其孰
能預於此乎加以道尚朋執情敦讌喜每至星搖劍

室月下珠潭。菱津迴棹。女之喧。桃逕詠樵童之樂。臨
萬家之井邑。眺千里之風煙。良談閒起。清文不輟。信
可謂兼文兼武。公才公望者焉。聖上深視九重。高居
萬寓。廼睠時政。分命使司。端冕旒而思天下。布德澤
而周海內。博訪英髦。探求異術。十道飛駟。萬域承風。
江東黜陟使朝散大夫行度支員外郎攝右臺侍御
史源乾曜。崖岸孤聳。風飈秀出。千仞罕節。百尺無枝。
地入星臺。列珠軒而應翟庭。分月樹搖鐵柱而驚鳥。
冰霜凜白。簡之威霞。日聚繡衣之色。遙同李邵。上迴
星鳥之暉。俯類張綱。先懾權豪之氣。以君才地加之
聲實。每肆揄揚。先膺荐舉。王生千里。佇入於匡。佐荀

氏十旬行登於台府顧盼之重郡縣增榮馳表疏於
龍閣遽翻飛於鶯路隨郗詵而齊舉攀鄧攸而不留
黯黯津亭搖搖軒騎壽春遺犢將折轅而共分葉縣
歸鳧逐行舟而俱遠由是三吳士庶二江人物來暮
之歌方遠去思之戀益深期穀君於一年思段侯之
再撫丞魏烜家承軒冕代傳儒墨鳴謙自牧處劇若
閑以涵牛之巨量貳割鷄之小道主簿崔子佺相門
卿族玉葉金柯光彩可以射人風神可以凜俗尉李
芬張隱朝章佩嘉勛等並公侯復祉琳瑯積譽經史
足用刀筆推工斯是迴東道之姿多屈南昌之化鄉望
等或者年宿望或盛族名家負雲澤之懷寶馳水鄉

之俊逸山川舊迹龍蟠武踞之閒軒冕餘風東箭南
珍之亞並殮和浴道多從食椹之恩老安少懷久沐
惟桑之化雖功成帝力上皇之耕鑿已勤而事稟圖
經下邑之風猷可紀是用傍遵縑簡俯緝謳謠覈南
襄之故事採西郭之前躅飛丹屑瓦行杼雕金之思
相質披文無媿沈碑之浦其詞曰

山岳■氣河汾孕爲基構百尋源流千丈地靈塊軋
天姿肸蠁長寧建侯襟懷洞朗江陵奕載風颯峻上
躋隱鉤深知來藏往斲雕爲朴用晦而明文緯天地
武定縱橫如周稷禹似漢良平金社開封珠盤載盟
逃矣遐緒猗歟克生

紫碑詞每段六韻唯此明橫平
盟生隴五韻必脫去二句也未

此拓本姑識乘彼靈慶光斯燕翼道映時宗言爲士
則月鏡虛湛雲峯迴植藝蘊縑緗材經邦國金玉其
行筠篲其德鶴鳴不已鴻飛未息欲麗九成先階一
匱比迹庠序聯芳旌旆軒瑩卜遠禹山云萃倚玉推
才雕金纂懿秦關漢輔吳田獬地孫楚叅卿蕭何主
吏鴻鐘待扣明鏡不疲詞端筆杪月落雲披時更出
處道或推移曾叅盡孝賈誼傷離五湖東指三峽西
窺六修齊稟百里均知帝道光亨聖人有作如鵬得
吹似魚縱壑越自奮飛載翔廖廓珠江控海金陵負
郭夏禹經營農皇甄度星躔牛斗雲連蜃閣令長何
擇循良在茲駟駕宓賤雕鏤馬期政實無擾人稱不

欺韋弦是緝冰玉攸資神憂河甸獸斷江湄蝗去無
限鸞歸有時八使出關二星向蜀乘驄衣繡揚清激
濁黜陟攸先椎埋是屬上敷帝念下從人欲一聽謳
謠載欣風俗行收顧眄坐成珠玉若管知鮑如蕭待
王君子既見爲龍爲光選衆而舉載掄載揚飛日
路驛薦雲莊眇眇雲澤颺颺水鄉西北萬里東南一
方坐結去思長嗟來暮躑躅輦壤怱遙鷺路何以報
恩宸階遠訴何以旌德高碑迴樹潘岳創詞楊修辨
句一刊懿迹千齡垂裕景龍二年歲在戊申二
月十五日建朝散大夫行雍州錄事參軍張景毓字
燭微撰業行寺主釋翹微書

唐故朝議郎行兗州都督府方與縣令獨孤府

君之碑銘

唐劉待價

聞夫軋蓋上闢星緯分其經舍坤輿下蟠河岳裂其封域是以觀象體物建百里之庶邦敦俗牧人置千石之多士則有威霽風雨稱明鏡於當時德洽絃歌号元龜於後葉其有繼美宣化教肅刑清作根本於巖廓爲喉命於黔庶休明一代映徹九泉歷選徽塵歸獨孤府君矣公諱仁政字仁政河南洛陽人也本姓劉氏導擾龍之巨源長河不竭䟽斷地之曾岫連岳無窮屬逐鹿於中原乃避時於北漠因山易姓以氣雄邊及魏室之鬱興服袞論道遷周邦而扈從衣

錦還鄉吐奕葉而增昌。朝盈紫綬聳本枝而逾懋。郡接朱轡菌藹紛綸可畧而述。高祖永業齊中書舍人南道行臺右丞洛州刺史遷左丞加散騎常侍儀同三司特進行臺左僕射封夏州啓寧縣開國公武安郡開國公廣州德廣郡開國公西平郡開國公瀛州章武郡開國公彭城郡開國公各食邑二千戶賜鼓吹一部絹布各二千疋錢卅万俘口三百餘人馬五十疋轉七兵尚書兼吏部尚書入周拜司徒公行臺尚書令冊臨川王大司寇少右弼謚曰貞佩金章於黃閣綰螭綬於玳筵內助理於萬機外佐平於百揆奇籌獨運戶邑光於六封雅樂相喧鼓吹標於四錫

曾祖子佳。周柱國直閣將軍武安郡開國公華州刺史儀同三司。隨大將軍涇州刺史應國公。拜壇虎將。祠黃石以傳書。刺郡神君。褰赤帷而察俗。賞茅土於奧壤。以荅元功。進儀服於太階。還尊懋德。祖義恭。隨京兆郡富平縣令。唐秦王府倉曹叅軍事荆王府長史右衛郎將左衛中郎將左監門率溫汾歸婺四州諸軍事婺州刺史上柱國高平縣開國侯雍容朱邸陪文雅之良遊。巡警紫微膺爪牙之重任。百城宣化得賈父之能名。五等開封獲通侯之美稱。父士贇。唐宏文生文德皇后挽郎虞庠之胄。必擇士林。楚挽之郎寔資門蔭。選授霍王府戶曹叅軍事密王府兵曹

叅軍事原州都督府戶曹叅軍事轉汴州尉氏縣令
遷坊州郿城縣令上騎都尉行丹州司馬襲爵高平
縣開國侯幕府端簪聞爲善之最樂列曹從務佐激
濁以增清叔孝擒姦智窮於耳粟伯騫薦士語重於
笥金孫氏襲侯尚食漢閒之地謝庭蘊玉還光席上
之珍惟公騰秀二儀降精五緯髫年對日綺歲叅元
成千里之權竒望雲驤首刷五色之毛羽抱義賓王
起家皇朝左勲衛左金吾引駕出警入蹕統式道之
朱麾夜傲朝巡司禦戎之金革解褐思州司倉叅軍
事像水之平法絃之直遊刃盈庭之訟發蒙列局之
疑掌十二之人天致菽粟之流行改授宣州溧陽縣

丞南服水鄉北斗星分吳越雜錯士吏剽輕公贊銅
章以化人持水鏡而照物季俗爲之懲革淳風由是
興行轉朝議郎上護軍行兗州都督府方與縣令法
三異之化振百里之雷敦禮義以教人薄聚斂以富
俗女脩織衽不下三齊男務耕耘還登九穀椎埋止
息桴鼓於是稀鳴囹圄空虛簡牘以之無事旣而焦
延罷職上書願留劉寵去官攀轅而送方同胡紹專
城之任克遷遽等宣尼倚戶之吟斯作以景龍二年
三月廿九日遘疾卒於河內郡之私第春秋七十有
七士喪衣冠道亡儒墨德音何在恨九言之不追魂
氣何之痛百身之無贖惟公抱素懷璞蹈孝履忠蘊

智成囊含明作鏡。敞三白之虛室。汎登仙之桂舟。酌其流而惑淺深。庇其宇而忘寒暑。儒林罩月。武庫驚雷。六義分落錦之篇。八體下崩雲之陣。阮公琴酒。情盤脩竹之間。尸子登臨。神王長松之下。清門赴弔。無雜号之賓。儉室奉終。靡一金之產。可謂至德君子。人之楨幹者也。以景雲二年歲次辛亥二月。景子朔廿七日壬寅。遷窆于洛州河陽西北韓城鄉龍臺里之平原禮也。馬啓滕城鳥飛楊墓。晚風含怨。託松柏以揚聲。斜日緘愁。向煙雲而沮色。嗣子宗業。隆堂構。孝極天經。攀翠柏以長悲。奉元醪而永慕。想元成之祖德。遂述家風。鑒陳寔之貞碑。爰題翠琤。庶陵移谷。變

竹帛非堅而懿德嘉聲乾坤等固其詞曰

擾瀧䟽派斷蛇分族遇亂中原避時北服因山易姓
待時千祿其北魏稱帝佐命爲臣爰從鳳蹕式返雞
津祚茅食采華轂朱輪其踵德誕美韶姿令器渾金
璞玉霜鶴雲驥論起談天詞成擲地其振翼鳳穴統
武兵欄捧戟侍帝綰綬除官霜凝吏道花飛筆端其
一同蒞俗五美興化剽劫懲奸嗤眩息詐女脩纂續
男務耕稼其攝官稱謝攀轅告歸佇遷喬木奄落斜
暉昊天不憖與吾何違其相彼青鳥啓茲元室縞駟
發軔丹旒颺日九原不返千秋永畢其贈人悲而結
悵弔鶴思而氤氲薤灑泣珠之露松經慘玉之雲爰

勒銘於元石以作固於清氛

其八

劉待價撰

吏部常選宏農劉珉書

碑出孟縣前人未見

大周故鎮軍大將軍行左鷹揚衛大將軍兼賀
蘭州都督上柱國涼國公契苾府君之碑銘
并序

唐婁師德

原夫哲后時乘璧人貞觀必俟風雲之應以光朝列
尤資棟榦之材式隆王道若乃傑出文武挺生才俊
道符忠孝性與清白高視於冠賈之前獨步於韓彭
之上肸響名教蟬聯簪組許史焉可儔金張莫能匹
四海慕其風範千里仰其談柄玉質金箱探蹟索隱
沒而不朽其唯賀蘭都督涼國公之謂哉君諱明字

若水本出武威姑臧人也。璽期爰始，賜貫神京。而香
逐芝蘭，辛隨薑桂。今屬洛州永昌縣，以光盛業焉。原
夫仙窟延祉，吞霄昭慶。因白鹿而上騰，事光圖謀。遇
竒蜂而南逝，義隆縑簡。邑怛於是，亡精鮮卑。由其褫
魄恤允，於前涼之境。茂俗於洪源之壑，良史燾焉。此
可畧而誌也。曾祖哥論，易勿施莫賀可汗。遞襲珪璜，
夙傳弓冶。共棲梧而比翼，與良玉而齊價。濯如春柳，
勁逾霜竹。英名振白山，雄圖光紫塞。祖繼莫賀特勤，
積代爲英傑之先。光圖絢史，保家爲名教之首。拔今
超昔，宏材膠葛。洪源浩汗，映竹史而騰芬。綴錦書而
擅響，父河力鎮軍大將軍。行左衛大將軍，檢校鴻臚

卿檢校左羽林大將軍上柱國涼國公贈輔國大將軍使持節并汾箕嵐四州諸軍事并州大都督謚曰毅公塋積膏腴門標英偉發言會規矩動容成楷則學該流畧文超賈馬威青海而安白道光三部而截九夷揆務棘司爲羣寮之宗匠膺榮蘭錡成五戎之淮的而鍾漏斯盡而贈崇班聿加千里之榮俄處六條之位哀榮之禮旣洽朝野式瞻送終之典更隆搢紳翹德公赤野生姿青田矯翰家蓄古賢之操門傳高士之節年甫一歲穉上柱國封漁陽縣開國公食邑一千戶八歲起家穉太子左千牛十一歲朝散大夫太子通事舍人裏行十二歲奉輦大夫若夫紫禁

青規之所必擇賢而方璠玉階金闕之前實高門之攸處所以榮加髫髻澤及綺紈鳴玉鏘金光前映後乃人物之儀表實衣冠之領袖重以河山險要惟賢是居爪牙任切非親莫委麟德中璠左武衛大將軍賀蘭州都督自非承家奕葉累代衣纓焉可內奉鉤陳外應刺舉者矣相府在藩爲涼州道元帥以公爲左中軍總督侍中姜恪爲涼州鎮守大使以公爲副然則朝端妙選實佇異能望重材高允膺僉屬後以鬻海未清虵川尚阻戎車所及尤俟英將從中書令李敬元征吐蕃公爲百海道經畧使於是南討吐蕃北征突厥累摧兇醜勲績居多後狼山及單于餘

黨復相聚結奉制討擊應時平殄前後賢勞不可勝紀改穰左驍衛大將軍襲爵涼國公食邑三千戶賜錦袍寶帶金銀器物雜彩綾錦等數千件穰長男從三品以酌功也仍改爲燕然道鎮守大使檢校九姓及契苾部落公倣裝遵遠望赤水而前驅勁騎騰空指白蘭而長驚左縈右拂八校於是爭先斬將搴旗三軍以之作氣遂得降絲言以隆爵命自而府而錫珍竒金貝咸紆繒錦交集列鼎而光祖祔分茅以惠子孫策勲居寂又穰雞田道大總管至烏德鞬山南招降二萬餘帳縱使李牧寧部魏絳和戎推昔揆今當率岡二尋穰右豹韜衛大將軍未幾復改穰左豹

韜衛將軍并充懷遠軍經畧大使又依舊知燕然道
大使公高望重亟膺獎擢得人之譽聞於朝野惟大
周革命重懸日月擢旄鎮軍大將軍行左鷹揚衛大
將軍餘並如故有制曰鎮軍大將軍行左鷹揚衛大
將軍兼賀蘭州都督契苾明妻涼國夫人李柔順成
姿幽閑植性聿脩婦德每勤於玉道叶贊夫家必存
於忠義既竭由衷之請宜覃賜族之恩并及母臨洮
縣主並蒙賜姓武氏公侯必復河洛胄賢屬寶運之
開基接僊潢而錫派忠貞無替聲逾金氏表裏承恩
勲高石窌後稷朔方道總管兼涼甘肅瓜沙五州經
畧使度玉關而去張掖棄置一生瞰弱水而望沙場

橫行萬里幄中有策閫外宣威豈直操履冰霜固亦
心符筠玉名高一代氣逸九霄者矣既而司寇逝川
俄結頽山之恨將軍大樹行聞斷石之嗟悲夫以瑩
證字案餘已見順陵碑者不更出瑩元垂臘^①①月字順陵碑作四廿三^②邁
疾薨於涼州姑臧縣之里第春秋卅有六制曰悼往
贈榮經邦之懿典飾終加等列代之徽猷諒以褒德
勸能念勞追舊者也故鎮軍大將軍行左鷹揚衛大
將軍兼賀蘭都督上柱國涼國公契苾明理識開舉
局量沉雄家著勳誠代彰忠懇早膺朝寵夙紹庭規
秩峻銜珠寄隆賜鉞入叅巡警恭慎之譽必聞出綏
藩落威惠之聲兼濟^③轡不留夜舟俄徙未窮遠畧

奄謝昭途。燹想嘉庸。良深矜歎。宜申殊澤。式旌幽壤。
可贈使持節都督涼州諸軍事涼州刺史。餘如故。賜
物三百段。便於涼州給付。所緣葬一事以上。並令官
供。仍差涼州都督府長史元仁儼監護。仍令朝散大
夫通事舍人內供奉邊懷秀弔祭。旣而居諸易遠。宅
兆攸資。金甌泛泉。玉雞伺旦。粵以大周萬歲通而元
季歲次景申。八^甲庚午朔十五^乙甲申。葬於咸陽縣
之先塋。禮也。禮司謚曰。公夙承門閥。早踐通班。茂績
昭宣。聲望顯著。學該流畧。藝總兵鈴。以孝安親。以忠
奉國。終始如一。存歿不逾。旌善易名。宜^典彝典。實^按謚
法。寬樂令終。曰靖。靖公。惟公降^{淳粹}而蓄^環

奇稟精忠而挺才望韶儀淹雅難窺於得失逸調清
通不測其涯涘抑揚人傑彫績士林等桃李之無言
若朱藍之在性先仁而後己鄙利而尚賢亭亭有千
丈之幹其高非易仰汪汪如萬頃之陂其深不可測
有碩學焉有令問焉擅非馬之雄辯蓄靈蛇之雅作
逸氣上煙霞之表高明振朝野之際五公七侯之盛
僅可執鞭曜蟬鳴玉之榮纔堪捧轂如揚彪之承伯
起若班固之嗣叔皮加以懸榻翹賢分庭接士衣裘
輦馬朝成夕費兼濟之性光映人物乃構厦之良材
映車之名寶者矣夫人唐膠西公孝義之長女也齊
輝婺彩擢幹瓊枝莊敬率由於天然抑揚女史溫柔

稟之於本性。光輝內則。旣而雄劍潛鋒。崩城起恨。毀瘠逾於大禮。攀號洎乎剪髮。夷夏足其悲哀。搢紳增其慘感。屈己而遵女誠。飭躬而宣婦道。可謂承家稟訓。執仁組行者歟。長子左豹韜衛大將軍兼賀蘭州都督上柱國涼國公。次子右武威衛郎將上柱國姑臧縣開國子。嵩右玉鈐衛郎將上柱國。番禾縣開國子。崇等並早涉義方。夙延庭訓。孝心冥弊。至德純深。及候氣纏憂。先嘗空術。充窮盈感。孺慕增悲。棘兒由乎絕漿。柴毀幾於滅性。可謂至德冠幽明。窮迷傷骨髓。哀號擗踊。獨超前輩。雖罔極之誠。踐霜露而逾感。相質之重。映今古而垂裕。是用傍求翠琬。式樹豐

碑家風祖德居然在斯用以光士行用以芳本枝歷
千秋兮無斁經百代兮無虧銘曰

東井蒼蒼西土茫茫而開分野塋列封疆門多英毅
代產忠良偉哉人物紛乎典章其前涼後涼乃祖乃
父赫奕冠蓋蟬聯文武金箱玉質光台映輔至德符
孝貞心翼主其可汗嗣出抑揚流輩業盛后昆道隆
前燹遐迩欽挹夷夏欣戴四海英髦共推貞槩其特
勤垂裕搏風振翼孔席申歡嵇松比直智水游泳仁
山止息討本尋源斯標岐嶷麒毅公雅節莫之與京
既忠且孝王佐人英研精流畧捐良平昭昭餘慶
恤允膺榮其挺生異材齟率振響未盈小學亟承恩

將門閥易隆。牆仞難仰。學行無數。名實逾廣。其露冕
關河。式清邊徼。遽宣威德。聿敷名教。肅彼夷落。鎮茲
襟要。人揚德宇。窮微盡妙。其綏邊寄重。尤資望族。顯
允奇材。悠然嗣福。外清荒憬。內膺榮祿。總戎之寄。聲
連秘牘。其詵詵于熙。屢警邊城。侵乙躍馬槩甲揚旌
橫雲列陣。背水開營。未經千乙。俄夢兩楹。其光驚繡
留居諸。易促旋悲。委珮遽傷。埋玉松蔭。隴兮均青草。
榮墳兮吐綠。式鑄貞琬。以光勝躅。其先天元年

歲次壬子十二月十六日辛亥孤子息特進上柱國
涼國公嵩立父碑。肅政御史大夫上柱國婁師德
製文。左肅政御史殷元祚書。今石本損泐。據汪太史唐碑錄存載之。

大唐處士胡君墓誌并序

君諱佺字尚真定安人也。遠祖曰宦遂。凡介休夫穰。椽是佐。錯胡綜之文章。清白知名。見胡威之父子。光光懿烈。不替先風。簡謀詳諸。可畧言矣。祖買隋孝廉舉文林郎。幼洽詩書。長崇禮樂。太初玉樹。夙擅嘉聲。韋氏金籬。遽昇高第。父端養素不仕。情貪野薜。志篋裘裳。道王丘琴。跡存山水。君濯濯儀形。汪汪軌度。珠胎孕月。光彩絕倫。蘭若銜風。幽芳自遠。鄉里稱善。喻彼少游。文籍自娛。同夫孟陋。遺累嚙滓。傲性煙霄。簪軒不介於懷。寵辱不驚其慮。歲臨辰巳。鄭康成於是云亡。月犯少微。謝慶緒俄而致殞。春秋七十。卒于私

第夫人石氏穠荷比秀美箭齊貞宜其室家和如琴瑟翰林之鳥始雙飛而隻飛龍門之桐俄半生而半死嗣子懷爽懷玉岵岵長違霜露增感粵以開元三年歲次乙卯龍集單闕十月己酉朔廿五日癸酉遷窆於介休縣東廿里平原禮也縣上山傍昭餘澤右懼陵谷而驟易思封樹而永懷乃爲銘曰

盤根安定散葉汾壩乃祖乃父光後光前惟君節槩業尚虛元鬼瞰庭宇鳥鳴座筵不逢石髓俄歸玉泉一闕上隴長嗟逝川

唐故葉有道先生神道碑并序唐李邕

昔者誕發老君道純天地生得夫子身負日月且時

宰不宗主人勿用矧乎埋照後谷潛盤窮山幽姿蛻
於塵容素尚允於仙類豈辟命行矣爵服繫之而已
哉公諱國重字雅鎮南陽葉縣人也自少典錫羨高
辛纂緒陶唐重熙后稷邁種文王之允乃食於沈尹
戍之子載封於葉受氏享國大哉邈乎逮乎祖乾昱
克壯其猶永孚於德瑾戶習隱塞允億坤碩膚長材
通理博藝雖安車累至而堅卧固辭故慶祚克開眉
壽維永矣厥考道興性守宮庭道敷邦國居鬼從地
率神從天受籙以怛之飛符以北之扼魍魎之邪劉
臺台之崇有足竒也至於揮札落紙引弓貫革特起
五部廣推大餘侯誰嗣哉先生靈承道宗異聞訓誘

弱喪文貌。幼尚純篤。仙骨有象。童心不萌。專精五龍。遍遊羣岳。聰以達遠。明以察微。達死生之占。體物氣之變。嘗靜貞動耗。息影歸止。雲外闕壑。林巢仙居。人絕不鄰。道阻且右。獨往幽勝。永歌隱淪。放聞保和。習虛致靜。据五石之髓。擷三芝之英。時哉不留。歲聿其逝。緇髮純漆。韶顏渥丹。事適元同。神與道媾。惟寂惟冥。不飲不食。數十載於茲。乃昇聞帝庭。駿發皇眷。簡才受命。降尊加禮。將之以文馬。速之以暢轂。先生盱眙長揖。握手高謝。曰。自昔帝舜登庸。德輝允鑠。光武繼統。吏道孔嘉。且薛方逢萌。備外臣之禮。虞仲夷逸。終處子之業。豈垢俗疵物。偏貢介性。將探道慕類。坐

致奇齡使者蓄而之疑申遂行之旨乃周覽廬室躬
省倉廩考疇人之疆晦訊家童之作業皆儉以遵約
安能維始味不甘口色無養目信以爲著誠去僞敢
守難奪順風可即強起曷至焉遂虛覲復命慙歎聞
列朝廷企其高渴其道聆嘉聲而屬闕者豈勝言哉
有司以天元書缺星度官弛亡五德之運謬四時之
分荆鬼越祥不知所況子亥母癸烏識其原皆乘遽
遠尋請益傳受可謂繩誠列而曲直徵衡誠懸而輕
重立粵惟博物君子豈伊小說鯁生嗚呼天不持久
人將復歸殯年迫於期頤遠志屈於摧落卜兆幽石
託墳清林逸人不追國士靡憲泉石沮色鄉縣失聲

豈無他人。惟子之故。允子慧明。贈銀青光祿大夫。歙州刺史。公因替厥繇。代增其業。啓祕籙之高妙。揚元津之洪波。道微若聲。心麼若氣。吹律煖谷。運歷知天。屢下辟書。終不應命。孫子景龍。觀道士鴻臚卿。越國公。幼得父書。早傳成法。夤念有訓。邁迹自身。讀天下之書。備方外之術。火滌淫祀。劔誅羣妖。恩開五君。名動四國。其入也。排金鎖。謁紫庭。爲帝傲吏。出也。法玉京。坐元寺。作仁宗師。故能大匠道門。冢卿朝右。禮食軒座。寓直禁廬矣。嘗以理氣自強。登老益壯。雖暮景急節。而純孝孔哀。是獻封章。願拜墳墓。有軼帝念。載形王言。神札以飛。傳瑞乃發。羣公悵錢。列蕃郊迎。朝

輝有章鄉人皆慶枉以末技揚於孝心惟先志以追
遠立豐碑以紀德夫何閒然其詞曰

宗門素履家代隱仙道一相孕薪火交傳黃公術左
赤水珠聯道開幽鍵性與真筌一門累祖四世百年
抗迹巖谷消聲天地卓尔遐舉藹然高致麝以臭焚
珠以明墜人則有心微亦不至保身匪媮全樸爲利
孝孫增業明辟順風志嘗無忝事或不同微賢朝滿
舉逸山空曷由高枕克謝代工測微達變盡規納忠
皇眷雖渥孝思亦深章服粲粲傳駟駿駿載違廷闕
是展墳林紀石追遠昭銘率心孝終事立榮歿寵今
遐超古始永憲江南

開元五年歲在丁巳三月

七日括州刺史李邕文并書處州志載此文爲法善使李邕夢中書之故名

追魂碑錄以志異聞

大唐贈欽州刺史葉公神道碑唐李邕

公諱慧明字德昭南陽郡人也其先系自軒后殄于周文聃季食沈子高封葉因爲氏矣逮問政孔孔好龍得真代有聞也昔者惟帝興運乃聖炳靈風雲相從卜夢通感閒氣駿發良弼大來有開必先憑物爲爲因自然矣則我使君降僊府乘道流追縱隱淪叶契幽叟結廬澗沚考盤巖椒同人利貞遁代勿用雅好酒德尤邃老經話言解頤精絕絕倒誘進不倦虛納盡好事集門長者闔里每至升月帷戶咏風林

薄植杖嘯谷。席皮琴山。泰然樂生。澹乎忘老。方其維
性。壽遡神僊。旬赤松之遊。縱黃鵠之術。外身先物。歸
根致柔。緣以大均。持以大定。色理不盪。寵辱不驚。繩
繩焉熙熙焉。孔德之容。罔可測已。故師長旌禮邦族。
與化智者謂智。仁者謂仁。雖褐塞桑樞。紵衣韋帶。必
避途加敬。襄風惕息焉。是用克聞於家。大育厥允。則
我越公。襲上德。延慶靈。生而知之。學而習之。有專門
之資。得不承之業。纔齟齬道。旣冠同元。訊遠岳之福
庭。觀幽尋之方士。陳呪雷駭。吐刃電光。沈海莫濡。蹈
冶匪熱。呵萬鬼。搗百神。啓陰官之符。變冥司之錄。追
穴往事。坐知來茲。膏肓無所遁其形。霧露不能滋其

疾竒跡多緒嘉聲日聞是以大君孔休辟命荐至入
自卧内問以咎徵造膝必誠遇事偕中時更四紀代
且五王順風以請天師敷枉以近皇極緇素莫能出
右公卿是惟虛左國家有事天地將旅海岳公嘗致
禮加璧能事潔羞傳駟載途郡邑迎謁者歲四三焉
自頃賊■嗇■小人吹蠱敢爲戎首興此厲階天步
未亨人事將殆公乃極陳幽贊大啟聖猷枚卜撰辰
並走羣望作爲邦翰先■主憂殄勦元兇翼扶皇統
是嘉厥異式揚爾忠爵賞懋於身寵贈光乎考匪此
父也曷訓其子匪此子也曷揚其親松楸已行碑板
未立永念終古追存孝思驟請闕廷第如江介遠訪

才子枉逮鄙夫趙括論兵多缺舊學班固述史寔賴家書顧惟成章實愧貞石其詞曰

眞隱夷軌默僊解形俛哉獨立企古遐征殆庶元德升觀丹經服鄉不涅光咏無營築卜岑渚上藥待琴徐嘯風谷緩步月林白雲怡意清泉洗心曷勝不往曷奇不臨迹因神遠情隨地深舉代方籍皇家未軾肇■懿子載揚令德左慈致物越人辨色司察鬼謀役使神力寵被五君聲聞八極日嘗薄蝕國有多難兇慝扇揚忠烈憤惋亦旣先覺克啗幽贊皇哉神武赫然天斷薄言即戎于以戡亂帝念疇庸典開列土豈曜厥身寔贈于父朱藩乃錫紫綬是與存致歿榮

忠仲孝舉烈烈桐柏緒風興悲表墓有闕紀德無詞
哀哀嚴蔭藥藥孝思孰傳終古是建豐碑 贈慧明

銀青光祿大夫歙州刺史子道士瀾善授鴻臚卿封
越國公 開元五年太歲丁巳鵲尾七月夷剽七

日甲辰建江夏李國子監太學生

故銀青光祿大夫秘書監兼昭文館學士侍讀上柱

國常山縣開國公贈潤州刺史馬公墓誌銘并

公諱懷素字貞規本原扶風其先自伯翳馬服具諸
史載暨漢南郡太守融命代大儒公即其後也十一
代祖機抗直不撓晉御史中丞扈元帝渡江家南徐
州丹徒故今爲郡人也代以學聞高祖消博綜墳典

仕陳爲奉朝請。曾祖法雄。慷慨倜儻。好孫吳。不事筆
研。陳橫埜將軍。祖果。碩碩學禮經。不隕素業。卽學士
樞之從父兄也。少爲尚書毛喜所知。陳本州文學。從
事父文超。果行毓德。精意易道。及洪範。頗曉氣候。貞
觀中。以有事遼。沮策名勲府。龍朔初。黜陟使舉檢校
江州尋陽丞。棄官從好。遂寓居廣陵。與學士孟文意
魏令謨。專爲討論。具有撰著。公卽尋陽府君第三子
也。幼聰穎。六歲能誦書。一見不忘。氣韻和雅。鄉黨以
爲必興此宗。十五徧誦詩禮騷雅。能屬文。有史力。長
史魚承曄特見器異。舉孝廉。引同載入洛。尚書倉
部郎河東裴琰之。博學深識。見名知人。音旨儀形。海

內籍甚公年甫弱冠便蒙引汲令與子之研覃遂博
遊史籍無不畢綜以文學優贍對策乙科乃尉郿無
何丁太夫人憂即陳學士宏直曾孫女也本自
名家貞高博識公在艱疚骨立柴毀殆不勝喪服闋
授麟臺正字少監京兆韋方直好學愛士善飛白書
以公旣及冠禮未嘗立字遂大署飛白云懷素字貞
規扶風之學士也封以相遺其爲時賢所重如此以
忠鯁舉除左鷹揚衛兵曹叅軍轉咸陽尉昔則天太
后大崇諫職授左拾遺深盡規諷尋改左臺監察御
史歷殿中彈紉不避強禦加朝散大夫轉詹尹丞朝
論稱屈遷禮部員外郎與范陽盧懷慎隴西李傑俱

以清白嚴明分爲十道按察以公詞學瞻洽精覈文章轉授考功員外郎修文館直學士遷中書舍人與李乂同掌黃畫踰年檢校吏部侍郎實允僉屬朝廷以刑政所急改授大理少卿關畿佇材除朔州刺史惠實在人入爲太子少詹事判刑部侍郎加銀青光祿大夫兼判禮部尋而正除刑部時稱愼恤轉戶部侍郎上以河南蝗旱令公馳驛賑給宣布聖澤所至甘雨使迴拜光祿卿遷左散騎常侍轉祕書監四部舛雜頗多殘蠹公備加校定廣內充積加兼昭文館學士與右散騎常侍褚无量更日入內侍讀每至宮門恩勅令闕小舉上殿自車丞相已來殆將千載始

見此禮公疇日自序云慕善嫉惡好學潔己自謂不
慙古人無負幽明矣直哉是言不騫厥信以開元六
年三月十日遘疾中旨遣御醫賜藥相望道路以開
元六年七月廿七日終于河南之毓財里第春煠六
十皇上輟朝二日舉哀■次乃下制曰存樹高烈君
子所以立身沒垂令名古人所以貽範銀青光祿大
夫故祕書監兼昭文館學士侍讀上柱國常山縣開
國公馬懷素越箭含貞楚材登用清芬獨映至德可
師自服勤典籍納訓帷展輔朕以媿道弼予以正言
允資惠迪實表泉懿而曾不憖留歎焉彫落思甘盤
之舊學臨宣明以增歎興言感愴用震悼于厥懷可

贈使持節潤州諸軍事潤州刺史贈物三百廿段米粟三百廿碩喪葬所須並令官給京官六品一人檢校公雖累登臺閣率身儉素俸祿之資賙贍親友及啓手歸全家無貲產唯有書數千卷以爲燕翼以其年十月十三日寔於洛陽古城之北原禮也有子巽等雖年在童孺禮過成人棘心纍纍感于隣巷敬勒行事以旌泉戶銘曰

益佐理水功施生人羨于馬服守趙却秦東京咸賚南郡儒珍德先惟永弈弈振振其朝請風素橫埜矛戟從事顓禮尋陽洞易公自名家伏膺經籍鼓鐘外遠純涂諱未內積其用材南楚待問東堂持斧作憲

含香拜郎再飛禁掖七踐文昌國傳茅土巷擁旗常
其井春紛紛桓榮稽古行儒師逸高跡誰伍公實踵
之堂奧斯覩匪徒外潤爰歸內補其惟昔殷后學于
甘盤一期千載遇君則難充堂何那其臭如蘭懿哉
夫子斯言不刊其仁謂必壽神期式穀生寄雖浮夜
趨何速寵極韓賜恩深衛哭徒望邢山豈忘喬木其
崢嶸徂歲寂歷空岑白日無影寒雲半陰燕城表滅
漢水碑沈貞臣之墓樵牧誰侵其

後漢大司農鄭公之碑

唐史承節

夫囊括宇宙者文字發明道業者典墳所以聖人作
而萬物覩賢人述而百代通禮樂得之以昭明日月

失之而寒忒宣尼彰刪緝之功秦始速焚燒之禍迨
乎羣儒在漢傳注瑤■莫不珠玉交輝纖微洞迹同
見集於芸閣獨有輟於環林豈若經教奧義圖緯深
術兼行者多無如我鄭公也公諱元字康成北海高
密人也八世祖崇哀帝時爲尚書僕射公少爲鄉嗇
夫不樂爲吏遂造太學受業師事京兆第五元始通
京氏易公羊春秋三統歷九章算術又從東郡張欽
祖受周官禮記左氏春秋韓詩古文尚書攝齋問道
樞衣請益去山東而入關右因盧植而見馬融考論
圖緯乃召見而升樓精通禮樂以將東而起歎三載
在門十年歸邑及黨事起遂杜門不出隱修經業於

是鍼左氏之膏肓。起穀梁之廢疾。而又操入室之戈。矛。發何休之墨守。陳元李育。校論古今。劉瓌范升。憲章文議。何進延於几杖。經宿而逃。袁隗表爲侍中。緣喪不赴。孔融之相北海。屣履造門。陶謙之牧徐州。接以師禮。比南山之園皓。鄉曰鄭公。類東海之于君。門稱通德。漢公車徵爲大司農。給安車一乘。所過長吏送迎。公乃以病自乞還家。董卓遷都長安。公卿舉公爲趙相。道斷不至。會黃巾寇青部。乃避地徐州。建安元年。自徐州還。道遇黃巾賊數萬。見公皆拜。相約不敢入縣境。時大將軍袁紹總兵冀州。遣使邀公。大會賓客。廼延升上坐。身長八尺。飲酒一斛。秀眉明目。儀

容溫偉。客多豪雋。並有才說。見公儒者。未以通人許之。競設異端。百家互起。公依方辨荅。咸出問表。皆得所未聞。莫不嗟服。將汝南應劭。亦歸於紹。因自贊曰。故太山守應仲遠。北面稱弟子。何如。公笑曰。仲尼之門。考以三科。回賜之徒。不稱官閥。劭有慚色。門人相與撰公荅諸弟子問五經。依論語作鄭志八篇。公所注周易尚書毛詩儀禮周官禮記孝經尚書大傳中候乾象歷。又著天文七政論。魯禮禘祫義。六藝論。毛詩譜。駁許慎五經異義。荅臨孝莊周禮難。凡百餘萬言。經傳洽熟。稱爲純儒。其所撰著。今並通習。是知書有萬卷。公覽八千也。齊魯開宗之。公後嘗疾篤。自慮。

以書戒其子益恩曰。吾家舊貧。爲父母羣弟所容。去
廝役之吏。游學周秦之都。往來幽并。兗豫之域。大儒
得意。有所受焉。遂博稽六藝。粗覽傳記。時觀祕書。緯
術之奧。年過三十。乃歸鄉。假田播殖。以娛翰空。後舉
方正賢良有道。辟大將軍三司府。公車再徵。比牒併
名。早爲宰相。惟彼數公。懿德大雅。克堪王臣。故宜式
敘。吾自忖度。無任於此。但念述先聖之元意。思整百
家之不齊。亦庶幾以竭吾才。故聞命罔從而黃巾爲
害。萍浮南北。復歸鄉邦。入此歲來。已七十矣。宿素衰
落。仍有失誤。案之禮典。便合傳家。今我告爾以老。歸
爾以事。將閑居以安性。覃思以終業。自非拜國君之

命問族親之憂展敬墳墓觀省野物胡嘗扶杖出門
乎家事大小汝一承之咨爾煢煢一夫曾無同生相
依勗求君子之道研鑽勿替敬慎威儀以近有德顯
譽成于僚友德行立於己志若致聲稱亦有榮於所
生可不深念耶可不深念耶吾雖無紱冕之緒亦有
讓爵之高自樂以論贊之功庶不遺後人羞凡某所
憤憤者徒以吾親墳壠未成所好羣書率皆腐弊不
得於禮堂寫定傳與後人日西方暮其可圖乎家今
差多於昔勤力務時無恤飢寒菲飲食薄衣服節夫
二者尚可令吾寡恨若忽忘不識亦已焉哉又年春
夢孔子告之曰起起今年歲在辰來年歲在巳既寤

以識合之。知命當終。有頃寢疾。享年七十有四。以其
年六月卒。遺令薄葬。自郡守以下。嘗受業者。纓經赴
會千餘人。廼葬於高密縣城西北一十五里礪阜山
之原。嗚呼哀哉。有子益恩。孔融在北。舉爲孝廉。及
融爲黃巾所圍。遂赴難隕身。有遺腹子。公以其手文
侶。己名曰小同。精通六經。鄉人尊之。時爲侍中。嘗詣
司馬文王。文王有密疏。未之屏也。如廁還。問曰。卿見
吾密疏乎。荅曰。不見。文王曰。寧我負卿。無卿負我。致
鳩而卒。悲夫。自夫子沒後。大道方器。公之網羅遺典。
探蹟今猶特立。鬱然時季。途屯志不苟變。全身遠害。
猗歟美歟。及范曄作論。有曰。王父豫章君。每考先儒。

經訓長於公常以爲仲尼之門不能過也及傳受生徒專以鄭氏家注云晉中興戴逵字安道以鷄卵汁溲白瓦屑爲公作碑手自書寫文語亦妙絕年代古而碑闕亡德音復而詩書在承節以萬歲通天元年奉勅於河南道訪察觀風省俗激濁揚清行至州界見高密父老云鄭先生漢代鴻儒見無碑記不以庸妄遂託爲文往以會府務殷無暇景歲序遷貿執筆無由今者罷職含香忝居分竹屬以閑隙乃加修撰耆舊者惟聞其名後生者不覩其事今故尋源討本握槩懷鉛兼疏本傳之文並序前言之目發九泉之冥昧播千載之

剪以繁華不爲雕飾

文先成訖石又精磨碑未建而承節卒正議大夫使持節密州軍州事刺史上柱國鄭杳以開元十三年秋八月巡茲屬縣敬謁先宗欽承墳墓之間籌度碑石之側公心至清不欲費■公性至靜不欲勞煩廼命參軍劉肫校理舊文規模新勒未閒肫又罷職仍令終事冬閏十二月公伺其歲隙因遣巡團便令建立惠而不費允協人神承節銘曰

煥乎人文圖籍典墳煩亂事翦定自孔君中途湮沒秦帝俱焚漢興儒教鄭氏超羣膏腴美地簪紱宏規嗇夫罷署京兆尋師中候乾象左氏韓詩雖稱積學殆若生知公之挺生大雅之懿囊括墳典精窮奧秘

六藝殊科五經通義小無不盡大無不備好學慕道
深思遠慮來往周秦經過兗豫侍中不仕司農罷署
盧植東遇馬融西去作者謂聖述者謂明躬違三辟
門傳五更周官東部漢蹕西京白玉遍地黃金滿籬
占卜潛橋行途過沛陶謙師友孔融高蓋山啓黌扉
草生書帶七十歸老三年赴會經傳洽熟齊魯攸宗
爵祿不受贊論爲功禮樂今去吾道皆東類于標德
比皓稱公闍尹擅貴禁錮連年乃逢宥罪方從舉賢
南城避難東萊假田誕膺五百終覽八千今年在辰
來年在巳嗚呼不愁于嗟到此勞我以生息我以死
道該八索神交千祀濊水之曲礪阜之陽通德爲里

鄭公爲鄉雲愁廟古月暗墳荒舊碑先沒新石再彰
詞愧黃絹心淒白楊明於不朽終古騰芳

鄉貢

進士■安中書丹徵事郎前行密州高密縣主簿
兼管勾常平倉事■裔篆額

大金承安五年

歲次庚申三月一日勒成

大唐元氏縣令龐君清德之碑唐邵混之

我國家再誓山河重懸日月明罰飭法覈名實之故
典考績宣力甄象魏之舊章皇道煥炳而時乘帝載
緝熙而日用德惟善政政在養人若令長子男銅章
墨綬而尤善最者可屈指而知宣父中都太公灌邑
童恢責獸卓茂遷蝗男女別途鬼神息暴以今方古

君何讓焉。君姓龐氏，名履溫，字若水，南安人也。其先齊逢伯陵之裔。曾祖卿憚，元勲佐命功臣，第壹等左武侯大將軍，封國公，食實封四百戶，贈幽平燕易。嬀檀等六州諸軍事，幽州刺史，謚曰肅。歷數雖改，雲雷尚屯，披荊棘者馮吳，佐元功者蕭鄧。將盟帶礪，畫象雲臺，圖兼衛霍。素此借字之容，仕遂漢光之願。嘔庸賞懋，食邑論封。祖同福，并州大都督府司馬，饒州刺史。左衛將軍安北都護，外揆望殷，銜珠寄重，匪親不擗，非賢勿居。早蓋南臨，尋振喬卿之譽，紅旌圖卷式，標鄭吉之能。考承訓，通事舍人鄭州司馬贊善大夫率更令將作少監，辭令抑揚，綸鳳述旨，題輿叶詠，展

驥治中洪洞方樟允供於邦造激揚少衆贊裕於搖
山君純德天資大材靈降龍章龍彩凝脂點漆出忠
入孝遊藝依仁荒蕪四壁寥廓千丈代陪豐沛親預
葭莩翼鱗翰之■接風雲之會漢表有外戚恩澤周
詩有申伯渭陽起家補昭文生從勲閥也長安二年
明經擢第擢宣州參軍尋授莫州司功參軍事秩滿
丁二親憂痛瘁塋枝哀酸鄰社往而不返杖而後行
纓禪一年甫從常調開元十九年春會府遂拜公爲
此縣令魯子臯之爲政禮變鄙人漢原涉之舉能威
行谷口庶矣富矣又何加焉導之齊之非君莫可君
有善政者七風電咸下於屬城樹稼獨滋於元氏其

政一也。頃以陽光暫亢，陰液乖旬，苗慮騰興，人或狼顧。公罄奠珪幣，稽顙壇場，俄而油雲四周，膏雨百里。其政二也。闢土菑畲，用丁分地，勸東作而播稼，課西成之銍斂。躬臨樹藝，親載酒醪，故使夏農服田，秋得其實。其政三也。詢知疾苦，所患虛丁，撫狀上陳，應時申削，籍無稅，人獲息肩。其政四也。修職奉符，不爲進越。下有鬱滯，必掣肘諭言，每課田租，時臨調賦，寬爲約，曾無再輸。其政五也。此地俗多慳吝，跼蹐彈絃，素曰難持。紫金石萃編云：當是治避高宗諱，更承欽宗書侍御史作持也。其說是矣。寬弛公整其銜策，適其權豪，輒去害羣，悛心斂跡。其政六也。先縣館宅，湫漏與百姓雜居，公薄責人，傭先

抽己俸。雖與慮始。而可以樂成。其政七也。是以廉平。稱職。西河知魯衛之風。清儉當官。南土變夷齊之俗。可大可久。是謂賢人之德。惟幾惟深。以成天下之務。公儀如繪畫。神若轉規。聲以聞於震雷。用無待於周月。惠如春露。吏人不能窺喜愠之容。結若冬冰。貨殖不能動首陽之行。蓄霜鍾於絳府。有感必通。淒月鏡於元臺。觸形皆照。邑老謝虔祐等。並鄉庭積善。掾吏安排。行義以達其道。隱居以求其志。相與族談城府。錯立康莊。褒德匪舒。宣風技癢。或叫帝閭而抒美。或邀使駕而論功。衆志誠如寒附火。於是圖徽翠琤。託懿金聲。其詞曰。

清風汎濫兮其來溥。茂宰馳能兮超卓魯。雞犬相聞
兮人安堵。一同仰之兮如父母。聽謳謠兮詢疾苦。踰
屬城兮光趙部。趙■遺風兮多懷忭。君子爲之屏姦
僞。化澆浮兮勗以義。邑■■兮市無二。政勝殘兮仍
博施。如水火兮時不匱。刻石鐫金兮遂傳懿。直爲循
良兮守名器。開元二十四年歲在困敦律中夾
鍾八日建。前鹿泉縣令邵混之篋。蔡有鄰書。

續古文苑卷第十八